

Журналистларга юксак эътибор ва рағбат

Марғилон шаҳридаги “Ижодкорлар боғи” маърифий мажмуасида 27 июнь - Матбуот ва оммавий ахборот воситалари ходимлари кунига бағишиланган тантанали тадбир ўтказилди. Кечага ўзбек журналистикасининг таниқли вакиллари, вилоятимиз оммавий ахборот воситаларида фаолият кўрсатаётган журналистлар, матбуотимиз фахрийлари ва ёш ижодкорлар таклиф этилдилар.

Қалам аҳлига ҳар томонлама эътибор кўрсатиш, уларнинг эзгу ишларини шарафлаш мақсадида ташкил этилган тадбир “Ижодкорлар боғи” марказида қад ростлаган Ўзбекистон халқ шоири, Ўзбекистон Қаҳрамони Эркин Воҳидов ҳайкали пойига гуллар қўйиш билан бошланди.

Тантана иштирокчилари Эркин Воҳидов мемориал музейига ташриф буюришиб, шоир ҳаёти ва фаолиятини акс эттирган экспонатлар билан яқиндан танишдилар.

Эркин Воҳидов номидаги ижтимоий фанларга ихтисослаштирилган мактаб-интернатининг учрашувлар залида ўтказилган тантанали йиғилиш фарғоналик фаол ва изланувчан журналистларга давлатимизнинг юксак эътибори ва рағбатини акс эттирган ҳаяжонли дақиқаларни тухфа этди.

Йиғилишни вилоят ҳокимининг ўринbosари, хотин-қизлар қўмитаси раиси Сайёрахон Алимова очиб, вилоятимиз журналистларини касб байрамлари билан самимий қутлади, уларга вилоят ҳокимининг самимий табригини етказди. Фарғона журналистикаси ривожига ўз ҳиссасини қўшиб келаётган бир гуруҳ журналистлар вилоят ҳокимининг Фахрий ёрлиғи ва қимматбаҳо совғалари билан тақдирландилар. Улар орасида “Фарғона ҳақиқати” газетаси мухбирлари Шерзод Қорабоев, Дилнавоз Қўлдошева, “Садои Сўҳ” газетаси мухбири Баҳридин Тоҷиддинов, “Фарғона таълими хабарлари” газетаси бош мұхаррири Асқарали Турсунов, Фарғона вилояти телерадиокомпанияси мұхаррири Нурбек Мирзаев, “Рұҳсор” телерадиоканали оператори Абдуллажон Рашидов, “Бешариқ тонги” газетаси бош мұхаррири Собиржон Темиров, “Тоҳир-Бағдод” телевидениеси раҳбари Тоҳиржон Ҳамроқуловлар бор.

Ўзбекистон Журналистлари ижодий уюшмаси вилоят бўлими раиси, Ўзбекистон Республикасида хизмат кўрсатган журналист Мұҳаммаджон Обидов қалам аҳлини қутлуғ байрам билан табриклар экан, ўтган йиллар давомида Фарғона журналистикаси ўзига хос ривожланиш палласига кўтарилигани, бу борадаги республика ва халқаро миқёсдаги ҳамкорлик ишларининг эзгу самаралари хусусида гапирди. Ҳаётнинг қайноқ нуқталарига кириб бораётган журналистларни мұхтарам Президентимизнинг ишончи ва эътиборига, оммавий ахборот воситалари ходимлари олдига қўйган талабларга муносиб бўлишга унади.

Байрам иштирокчилари ва улар орқали барча фарғоналик журналистларни Ўзбекистон Миллий ахборот агентлиги раҳбари Абдусайд Кўчимов, АҚШдаги “Америка овози” телерадиоси мухбири Навбаҳор Имомова, Ўзбекистон журналистика ва оммавий коммуникация университети ректори Шерзодхон Кудратхўжаевлар видеотабрик орқали қутлашиб, вилоятимиз ижодкорларининг миллий журналистикамиз ривожидаги алоҳида ўрнини эътироф этишди.

-Журналист аҳли шунинг учун ҳам баҳтлики, у ҳамиша одамлар орасида, халқ ичидаги юради, - деди Ўзбекистон Республикасида хизмат кўрсатган маданият ходими, таниқли журналист Севара Турсунова. - Бугунги замон журналисти эса ҳар қачонгидан-да тезкорлик, холислик ва ҳаққонийликни ўз фаолиятининг бош мезони деб билиб, қайноқ ҳаёт билан қадамба-қадам яшashi, айниқса, халқ қалбининг акс-садосини оммавий ахборот воситаларида бера олиши ниҳоятда зарурдир. Бугунгидай эътироф ва рағбатлар эса ҳар бир ижодкорга қўшқанот бўлади.

Турли соҳаларда амалга оширилаётган ислоҳотларни кенг оммага етказишида фаоллик кўрсатган бир гуруҳ журналистлар Ўзбекистон Миллий ахборот агентлиги матбуот ва ахборот бошқармаси, “Нуроний” жамғармаси, Маънавият ва маърифат маркази вилоят бўлимлари, вилоят прокуратураси, ички ишлар, солик, халқ таълими бошқармалари ва бошқа ҳамкор ташкилотлар томонидан тақдирландилар.

“Йилнинг энг фаол журналисти -2018” кўрик-танлови ғолиб ва совриндорларини тақдирлаш маросими, айниқса, жўшқин лаҳзаларга бой ўтди. Танловнинг турли номинациялари бўйича ғолиблари номи эълон қилинди.

“Энг яхши тележурналистик иш учун” номинацияси бўйича Фарғона вилоят телерадиокомпанияси муҳаррири Муяссар Ҳамдамова, “Энг яхши радиожурналистик иш учун” номинацияси бўйича “Рухсор” телерадиоканали бошловчиси Наврўз Магрипов, “Босма нашрлардаги энг яхши журналистик иш учун” номинацияси бўйича “Ферганская правда” газетаси мухбири Тамара Тошматова ва “Интернет журналистикасидаги энг яхши иш учун” номинацияси бўйича “Фарғона ҳақиқати” газетаси мухбири Шоҳидбек Аслоновлар биринчи ўринга муносиб кўрилдилар.

Мажмуадаги “Ош маркази”да тўкин дастурхон атрофида ташкил этилган ижодий гурунг вилоятимиз таникли санъат усталари, умидли ёш хонандалар иштирокида мусиқий дастур билан янада файзли ўтди.

Тантанали тадбирда қалам аҳлига қаратилган чексиз меҳр ва эҳтиром, юксак эътирофлар журналистларга катта ижодий қувват ва шижаот баҳш этибгина қолмасдан, уларни ҳамиша янгиликларга интилевчан, жамият ҳаётида пешқадамлар сафида бўлишга руҳлантирди.

Дилнавоз Қўлдашева

2018-06-29 16:31:11